

莆陽居士蔡公文集

十六

莆陽居士蔡公文集卷第三十四

墓誌銘

尚書屯田員外郎林君墓誌銘

葛君墓誌銘

葛處士夫人墓誌銘

贈殿中丞陳府君墓誌銘

尚書主客郎中王君墓誌銘

右千牛衛大將軍致仕陳公墓誌銘

尚書司封員外郎曹公墓誌銘

尚書都官員外郎致仕葉府君墓誌銘

尚書屯田員外郎林君墓誌銘

端明集卷三十四

一

君諱冀字希聖潮州海陽人也曾祖珍祖知藝皆以厚行為鄉人所慕父洪裔贈殿中丞少喜學問手鈔經史傳記數千萬言日講諷自休以是終其身母夫人許氏封潁州縣太君君既勝冠得所藏舊書益益刻厲考治以為詞大中祥符八年一舉中進士第歷辰惠二州從事以判入高等廼授大理丞又遷殿中丞太常博士入尚書省為屯田員外郎歷知歙州績溪及歙二縣治有善迹移同判桂州以母老還官事歸養不得請改知梅州被喪去



職及還朝復官通判杭州寶元元年三司度支副使段公少連薦君監京師征筭二年十一月戊子疾發且殆其子從先取股肉雜糜殮以進食疾少瘳卒以其月庚子終于官所年五十四康定二年十一月初八日即葬于大墓之域夫人黃氏封萬年縣君持躬有法式處大族上下無異言子男從先從思從可皆孝謹力學女三人長適進士盧幾次適邵武縣尉阮邈其季始筭孫六人皆幼君讀書不以博記廣聞為志務躬行其所知者平居與衆言開陳理要或持異論亦未嘗力辨以屈之及

蒞官當事前有事勢可壓以奪人者君自守益固其直而後已在辰州時五溪夷獠嘯聚攻剽城中益兵以守君從所分卒往來督運糧餉每先期至事平詔褒之歙州舊常第民貲產歲斂錢三十萬傭僦舟人挽浙江鹽鬻以牟利久之民愈病或冗散旁郡轉運使以利病聞仍表君為歙縣兼總運鹽事君至更請募人為卒度材為舟歲漕益多而斂不逮下流者還集其服勞革弊舉是餘可知也初君卒將作監丞黃君瑊以書至洛謂某曰林氏諸孤哀不能言將扶持全柩背淮絕江山出吳

閩數千里還故鄉以葬幸而得子之文以銘其先
烈不亦慰諸幽乎某明道中從官漳州始遇君郡
下君以某為志於古者作詩稱譽嗚呼今以是銘
君墓辭曰

求而勿懈者享則既豐委而不與者畀迺弗克
覃延厥後兮紹德收功列文幽堂兮以訊無窮

葛君墓誌銘

君諱宏字文淵先世居廣陵唐末廣陵兵起舉族
渡江而南至江陰遂留家焉曾大父諱龐以耆德
聞于鄉邦大父諱詳少嘗負知能謂於時無所用

不若施于吾家以自効乃力於田數十年累致巨
資益散施以廣名稱父惟明一舉進士不中退而
購書數百千卷戒子孫業之君始稚已能去紛侈
從鄉黨之學既長記誦通博由鄉舉至京師視等
輩之賢已者咸盡誠禮屏所挾焉而下之故與游
多聞世之士意氣豪舉文章亦甚壯健不能工偶
配皂白剪磨細碎以是五試春官輒蠲罷晚乃寄
隱於酒觀少年新學躡其後跳取貴盛一以命
決不挂于中然以已之所學稽本於古人揣稱當
世之務甚悉苟汨焉無聞孰與發而在人慶曆元

年秋詔選進士君時已沾疾猶強力持筆研屬文辭以求貢比歸益疾殆九月四日終于家享年五十有二以某日葬于青陽鄉母夫人承氏與君之父皆年七十餘而哭其冢子哀甚夫人耿氏躬率禮德以宜其家子男鈞鑄鏜皆嚮學敦謹將大其世二女長適進士陳賢又其季尚幼君於某為婚兄弟故求知君之深而宜銘其壙者某不得辭銘曰

悲乎文淵學足以辨興亡之端而文足以通義理之要卒不克施其命矣夫

葛處士夫人墓誌銘

端明集三四

四

夫人姓承氏世為江陰人居其家以孝謹稱父諱懷與擇其里中人以行聞者而歸之遂嫁為處士葛君惟明之妻當夫人之歸葛氏方為大姓族屬親疎姑姊姊姒節時往來佩簪纓珥序列慶賀者甚衆夫人處其間自少至壯且老卒無與忤孝婦於尊章恭畏自力姑于其婦益慰愛之故其生雖親者不敢少慢而死也雖疎者哭之亦盡其哀享年七十有六其終于慶曆二年八月五日以十月二十日葬於青陽鄉修德里之原下生子八人男

五人宏求皆舉進士不中第卒定向勤養不懈宜
上書論邊兵利害得本軍司仕參軍孫六人鈞最
為長既有子矣女三人長適屯田員外郎凌景陽
封丹陽縣君次適進士陳玉皆先夫人而亡季女
之婚著作佐郎館閣校勘蔡某為誌其所葬而又
銘之曰

夫人於家淑孝則聞既歸而宜法度是勤有子
入官女為士妻冢婦持孫福祉實多三月而葬
中禮之常考卜既吉宜冥文以藏

贈殿中丞陳府君墓誌銘

端明集三十四

五

府君之先曾祖諱沆本魏人仕後唐因官江東為
錢吳越王僞署朝散郎知明州鄞縣卒葬四明山
下子孫始為吳人王父諱鏗聲名出吳中錢氏欲
以補闕官起之不可皇考諱處瑩博學於周易揚
雄太玄尤推悉其要錢氏數以禮屈致冀得為用
亦避不顧及錢氏以地歸本朝遂徙居京師府君
既長矣傳解經術尤工楷法得善書多手鈔之嘗
夢人有授其著者因專意治易其得要妙皆誠
心潛通不扳舊書師說貴游大人或即其居而訊
禍福府君曰吾老於易於是求聖人心焉又以其

數度天地萬物消長及天下之所以興廢人之窮通不足引吾術以証愈閉距不言日與諸子孝經傳疑說雍然自娛垂四十年以大中祥符四年八月十四日終年六十四男三人長曰見素終尚書屯田員外郎曰太素字仲華秘書丞審刑詳議官曰元素舉進士女二人長適進士盧冲次適殿中丞潘軫府君諱光現字晦之以子登朝累贈殿中丞娶吳興范氏追封本縣太君以慶曆二年十一月二十七日葬河南緱氏縣唐興鄉蔣里以吳興太君祔焉仲華於某同年中進士第先葬以其世家來請銘刻銘之言名也列其先德以及自名府君之德著而嗣子繼以仕進仲華泣官廉平以材能稱於時將大其後銘曰

世以善修而賤貧者或驗於天若府君究易之本行潔而堅其享之厚孰與夫空富且貴者耶

尚書主客郎中王君墓誌銘

君諱惟正字晦蒙太原人曾王父諱襲王父諱劇贈大理評事皇考諱恩累贈尚書工部侍郎皇妣范氏追封昌樂縣太君胡氏封永安縣太君王氏之居太原者為大姓自君之先數世無顯者君

始舉明經咸平元年中第選注瀛州司戶參軍會
契丹鈔邊河北用兵擇能吏督芻糧君兼魏鎮定
三州皆以期辨轉運司以狀聞於朝授光化軍判
官兼通判用保薦者改光祿寺丞東封西祀恩再
遷大理寺丞贊善大夫又遷殿中丞國子博士賜
緋衣銀魚入尚書省爲虞部金部司勳三貲外主
客郎中初知懷安之金水通判耀州事州將尤濤
與君論事不相能條君十八事不如法者以聞詔
辨之逮獄具而濤悉以誣伏人益稱君廉能移知
絳州歲饑民流輒發常平倉粟賑之時權臣有不

喜吏在州下風君去之且得善官不肯應其後當
丞殿中抑久不報君力辨乃遷被工部喪罷歸服
除歷知遼雅衛德四州雅州之俗右鬼神而巫覡
憑依禍福勒民財以自利君按祠廟之不在祀典
者投其像於江撤屋材以補官舍巫覡爲之易業
龍圖閣直學士劉公燁表君廉平可監刺列郡授
荆湖南路提點刑獄升廣南西路轉運使時安南
西道節度使南平王李蘊薨二子與其叔爭立叛
掠宜欽邕三司敗戍兵殺寨主勢以益振朝廷委
君與曹克明圖之君訓兵走粟爲守禦策作木

龍斷欽廉海路賊不得進君度其內爭必一而止
勒兵待之踰年一子果殺其弟叔自立遣使稱藩
交趾平君應例遷回讓贈王父一官即評事君也
居嶺外聞祖母病請解使職幸得便郡以就養遂
知解州道京師圖上交趾事宜賜三品服至郡十
餘日徙晉州未幾為江東路轉運使丁永安太君
憂還克三司戶部判官言錢穀利病多所施行潞
州於河東號為繁會君得之勵精為治屢辨寬
獄入判三司憑由司出領亳州密州最後再為絳
州慶曆二年七月二十日終于解壽年七十一以

四年九月二十日葬于某所夫人韓氏封萬年縣
君嬪配之宜治家教子悉有法度子五人長曰敏
中試秘書省校書郎次曰建中試大理評事監楚
州鹽倉曰執中未仕而亡曰柔中遼州遼山尉皆
以蔭補官謹而好學為吏得其家法女適殿中丞
長路開次適潁川陳晟次適右侍禁陳宗望孫三
人君喜書史老益不懈尤通緯象卜筮之說持已
以儉奉官以法仕五十年而無吏過將葬諸孤謀
曰古人之傳於如今者託於文也况郎官於今應
刻石以載功德不刻不傳其惟孝思乎建中哀叙

其世系官次治迹走求文於余爲之銘曰
吏治之興功利修科條奮竒斷而不顧者斯可
謂之材矣然不移勢要根人以資已唯是令善
必昌厥後

右千牛衛大將軍致仕陳公墓誌銘

公諱顓文字輔臣其先世臨淮人曰珂者因官入
閩居泉州仙遊兵阻道絕乃留不還公之曾王父
曰太子太傅諱 王父曰太子太師諱隲皇考曰
贈中書令謚曰忠順累封南康郡王諱洪進皇妣
曰鄧國太夫人林氏曰河南縣太君林氏者以公

追封公之配曰太原縣君故永清軍節度使贈中
書令王公守斌之女公之男八人長曰西頭供奉
官宗顏次曰三斑奉職宗晦宗魯其幼而夭者曰
宗回宗旦皆奉職曰宗周借職曰宗可宗傑皆未
仕女十人長適皇屬右屯衛大將軍宗鼎三人尚
幼六人蚤世一爲內殿崇班閣門祗候馬崇懿之
妻公之歷官自南康王上漳泉土地之圖除武寧
軍節度使授公徐州衙內都指揮使王薨補西頭
供奉官七遷至供備庫使真宗皇帝祀汾陰恩恤
勲德之後以公爲閣門祗候公之歷任監筦之局

六秦州長道鹽酒稅護民渠文思院致遠務芻秸之司酒齊之職兵馬都監之命四興元府舒廣二州許州之長葛一為泗洲巡檢再為明越及虔吉郡都巡檢使慶曆二年以右千牛衛大將軍致仕明年二月癸卯終于建初坊之第春秋六十九以其年十二月丙辰葬於開封府祥符縣魏陵鄉吳子原從先王之域公之世家功業列于太史氏銘于大墓宜不復紀然某少時居鄉里聞長老為某言王本末自王氏世有全閩其後部將黃紹頗据泉州以守王與留從効誅紹頗有功及從効為帥

王為之副從効死張漢思繼之漢思昏不治王自代之太祖皇帝御天下間道請命於朝即授平海軍節度使太平興國三年以其族歸京師獻所有地朝廷不加一錢而籍二州之人耕於山漁於澤不罹禍患涵濡太平之澤者王之庇祐民莫如此深矣及其游宦知公之為人處豐貴顯榮之間而能脫奢豪之習清約恬默以自娛適招延士人講論書史仕宦四十年率以次遷未嘗吐一語以干勢要人臨官處事一以法令不能輒為輕重將老即引去截然有自止不屈之意終始善良公之沒

嗣子宗顏復以孝聞本朝之制隸武職者不爲居
父母憂去官宗顏力求解罷服喪以盡子道朝廷
從而獎之以率勵天下又能教其弟宗晦宗魯從
學謹飭信乎能蹈孝友之節者也供奉君謂予曰
嗟吾母氏以禮法持守門戶鞠養諸子慈孝均一
自先君子棄世時發篋視諸生平告勅撫而泣且
戒曰已矣乎不復見也孰能永乃翁之傳者耶敢
以哀請幸次先君子之行誌於墓某於陳氏所聞
所見通知其三世遂銘之曰

推公之父舉二州之地歸命於朝世名以忠推

公之子善天下之善服喪于家人謂之孝公乎
上承乎忠而下遺其孝公之令德於是而顯十
世之宥或以無有云誰必之視公之後

尚書司封員外郎曹公墓誌銘

公諱修睦字某建安郡人爲學通博性介廉喜自
修立大中祥符五年登進士第調撫州軍事推官
南雄州判官改大理寺丞知邵武軍之邵武縣遷
殿中丞知鬱林州聞母太夫人疾委州印於其佐
北走歸道未至被喪哀瘠過禮服除以太常博士
通判越州再遷尚書屯田都官二員外通判泉州

知邵武軍民有兄弟訟田者公爲陳兄兄弟弟之義民棄讓不爭代還前丞相杜公時爲御史中丞薦公材能拜御史踰年改司封出知壽州又移泉州瀕海有渠道迎潮波漑浸旁田數十里自渠水湮塞田蕪租逋公與疏渠流人還業尋坐舉者奪司封去官歲餘通判信州知吉州公皆不行泰然有歸止意上書願休官政以都官員外郎分司南京旣而嘆曰不事事而受祿不可謂廉復申前自列于上乃得請久之丞相章公言公退靜可敦薄者詔還所奪官居數年聲聞益達朝廷以紫衣

金魚就第褒之用聳動天下士大夫視聽以重進爲高慶曆六年春疾作次所爲文詞四百餘篇勒分三卷疾益清戒其子薄葬若世所嚮浮屠法輪錢擊鐘與計七日而去齋者皆不得用二月乙卯終于家年六十八月庚申葬建安縣萬石村公之曾王父諱某王父諱某皆潛德延休貶于後人皇考諱某累贈諫議大夫皇妣某氏贈某縣太君公之配朱氏封長安縣君治家有法卒壽州男覲建安主簿女四人長適南劍州順昌令丘與齡次適進士丘規次適太廟室長陳沂次適常州司理參

軍何辟男孫二人曰顓太廟齋郎曰某尚幼公兄弟二人長諱某舉進士蚤亡次贈諫議大夫諱某與公未仕時同名右鄉國號爲二曹及諫議居朝剛直好言明道中以刑部員外郎爲御史知雜事論請復辟觸章憲明肅太后怒左遷興化軍終貶所其後天子追悼前忠特以諫議大夫表之公年五十有四卽引身退第舍園池疏列泉石置冊書棊琴於其中意之所適則娛味終日賓親過從或道時事輒謝曰吾方與紙上聖賢語差樂勿溷吾聽以是兄弟皆有終譽公之在官不以法令繩

馭下吏刻已率之而吏益畏不以威刑驚憚下民平心治之而民益信嗚呼終始之節可謂善矣將葬其孤覲哭泣以書來乞銘銘可辭乎銘曰

重勢營利衆所趨也耄昏苟前世所愉也中年能休矯妄愚也惟公之存勵夸浮也西人之法志古無也今民涵濡費產輸也遺戒勿用遵禮儒也惟公之沒祛怪誣也

尚書都官員外郎致仕葉府君墓誌銘
葉氏之先居丹陽在唐梁之際有官于泉州者屬兵戈起因留官下子孫遂爲今興化軍仙遊人

時方否鬲連世晦遯不克進府君諱賓字虞卿
生當天下文治乃始業詞學應進士貢景德二年
中第注潮州海陽主簿再調連州桂陽令廣州節
度推官商人陳從吉鬻銅錢捕繫吏治急自誣已
鑄鑄法應棄市府君領案狀不署曰是物非巧工
不能為從吉商也且鑄必有范鎔具今無請更核
果得真盜鑄者從吉坐買賣得不死一府稱服繇
是有能名尋補建州節度掌書記以保任材廉
改太子中允累遷太常丞博士尚書屯田都官二
曹員外郎歷知泉州永春南安印之臨印三縣事

永春民有先惡嫌者冒重辟府君曰吾仇也獄雖
真人亦乘以訾我裁附輕比南安盜截牛舌其主
以聞府君陽為叱去陰令屠之即有告其自殺牛
者府君謂告者曰截牛舌盜汝也訊之伏其罪代
歸除通判南劍州事劍當閩衝水行持販茶鹽禁
物上下山出銅銀冶場凡三十餘所聚四方游黠
輕剽劫擊殺黨與牽連事日下吏懼滯繫被罪
率不暇精覈府君專意詰決民得盡其情而獄
無留焉還朝以年七十致官事家居九年慶曆五
年正月九日終壽七十九明年七月四日葬歸德

鄉長安里王父諱擅皇考諱素能以儒書訓子致
遂大其門累贈太常少卿皇妣陳氏追封潁川縣
太君夫人陳氏河南縣君厚淑恭謹動有婦則前
府君卒男二人曰任泉州司戶參軍所臨職既去
人輒思之曰傳登進士第終泉州晉江尉女五人
適郭尹黃佐郭日休郭憲皆進士其季之壻泉
州節度推官方慎德府君為政能察明善偽與
吏情隱苟有蔽謾必立見然正其事則已不深嫉
而窮治之故所至吏民憚其明而不怨躬自儉約
計奉以衣食歷官久無銖銖過累既老閑居勗諸

孫就學時行田隴視農事載酒肴與旁隣阡巷耆
舊往來道說前事以為樂晚年資用饒足嘆曰吾
其為利乎於是籍親戚富貧親疎者第而散之人
益知府君官有餘財而約不以資也葬之明年司
戶君以書并次其先君世族功治卒葬月日因其
子壻漳州龍溪尉許積以來乞銘於太史氏蔡某
某既以先達輩行視府君又與其子游遂為之序
且銘曰

葉先丹陽官遷于閩室久而通翰飛以振初盤
邑治爰佐南海直民寃死聲聞彌大于泉之治

决斷大明一語得盜脫仇附輕劔交衢途猥集
剽游事業叢獄夥乃恤乃孚還官卧家協比里閭
宴處遨遊歲月是逾老而中禮仕祿之儀儉則
克終德厚之基年豈不多茲實其歸載行於詞
永世之詒

莆陽居士蔡公文集卷第三十四

莆陽居士蔡公文集卷第二十五

墓誌銘

蘇才翁墓誌銘

瑞昌縣君孫氏墓誌銘

延安郡主李氏墓誌銘

尚書職方郎中謝公墓誌銘

內殿承制王君墓誌銘

右班殿直監磁湖都鐵冶務程君墓誌銘

泉州司戶參軍葉君墓誌銘

太常丞管勾河東機宜文字蒲君墓誌銘

蘇才翁墓誌銘

蘇才翁諱舜元其先自漢典屬國武葬武功其後周邳公隋房公唐許公文憲四相世居不遷文憲之後曰傳素避廣明亂西入蜀其子振仕蜀為梓州桐山令生劔州司馬寓司馬生贈刑部侍郎諱恊是為曾祖考其配薛氏追封河東郡太夫人刑部生祖考贈太師尚書令兼中書令諱易簡終禮部侍郎祖妣崔氏廣平郡太夫人禮部生皇考贈工部侍郎諱耆終尚書工部郎中直史館娶王氏金城縣太君太尉文正公之女生三子皆有才名

而才翁最長七歲能爲歌詩文正公愛且竒之奏授同學究出身調蔡州興平主簿移尉越之新昌時詔復唐十一科而新令門選者不得與焉君乞還所有官以應詔不得報乃上所著文章召學士院試賜進士出身明道中主開封之扶溝簿畿內饑甚君欲發廩以賑之其令畏縮輒移病君即出粟以活饑者用舉任者改大理寺丞服工部喪外除知開封咸平縣咸平聚兵以萬計軍中旦閱卒有厭大校之虐已者方持弓矢輒怒罵衆軍牽連一營驚譁君聞之至其所衆惶泣且訴君慰勞罷

之因飲射至暮明日易其軍校而流其唱爲驚譁者遷殿中丞移知眉州眉山會西夏元昊寇延安君條禦賊方略知府事吳公遵路薦其才除通

州事賊酋李興歸命邊州繫之而上其事踰時下君因言其賊來者宜厚其資速寵借以驅其未至者李興輩反爲囚虜必已自悔且元昊慘毒而其偏校雖畏之其心豈易服從哉若餌以購賞必相引而至并陳攻守利害十二事以聞以太夫人憂去守尋勾當京東排岸司改太常博士三司使王公任君三司勾當公事出爲荆南路

提點刑獄未行易福建路汀州民王審毆王先至死以賊蓋覆得不敗且三年矣君至即捕按尚書屯田員外郎王稷為部將治窮其事發王先屍驗其傷猶然以歲久為請君特奏殺之又遷尚書祠部員外郎移京西未幾又移河東以弟舜欽謫死湖州求江吳一郡得揚州未至改兩浙凡四皆為提點刑獄君益謹職顏杲卿真卿之後流寓温州君索其祖告身家牒推之得其實建言近年守臣因賊屈附抵法誅戮蓋忠義不修莫為之勸今二顏之裔曰惟致似賢皆為編戶民若錄其嗣顯白

二顏事以動天下可不刑而化朝廷特官顏氏二子祀明堂恩度支除京西轉運使邕州峒獠鈔二廣邊用不給君以所部羨錢二十萬緡助之克三司度支判官至和元年五月初二日終于京師之祖第年四十九夫人劉氏旌德縣君賢而有法男曰洎大理寺丞曰澥注洞皆太廟齋郎鴻汶及二女皆幼君曾祖而下葬開封府開封縣宰輔鄉才翁之歿汴無資產以為生諸孤就養江南居潤州侍柩以行某年某月某日葬於丹陽某鄉使人請銘某與才翁兄弟遊最久今皆已亡矣尚忍銘哉

初才翁少年欲以文詞進願還官就科試思與天下英豪角逐於筆研間以力決勝不得如其意逮邊隅兵興夙夜講畫謀策要以術數剪屈夷虜書屢上不見省用大臣如前丞相賈公丞相文公故參知政事范公皆持國秉力推薦之終以序進志不得騁平居談辯唐數百年間喜稱魏鄭公諫諍裴晉公德業李臨淮將兵衛公處邊事劉忠州通流財利韓退之文章類此數人而已其議當世人物亦以之為標的於人少所稱許至有同班列偕出入漫不省記以是與者益少然蒞官當事定

慮果決所至制束強黠敦尚風儀其為文不迹故陳自為高古雖所不與者亦不能掩也尤善草隸藏書數千卷皆手自讐校撰述奏御集十卷塞垣近事二卷奏議三卷文集十卷課子舍治經史率有準程所以諸子皆積學有立銘曰

龍淵之器不投兕犀孰知其利志古豪英不任於權孰知其智負才自高不屈於人與世或異先民之載德不必年賢不必位大江之南順卜之吉慶延嗣世

瑞昌縣君孫氏墓誌銘

夫人之父故禮部郎中直史館諱冕在祥符間能直言有聲名數更劇郡治用嚴明當世推重夫人少喪母鞠養艱勤及旣筭禮部自負才稱又加憐幼女孤苦必擇竒士得今尚書職方郎中葛君公雅遂以女歸葛氏初夫人之行公雅年餘二十以文詞中甲科爲州將幕官指期可得貴仕久之回旋銓筦僅工紀平居邑邑益不自得或復慨嘆夫人曰爲官窮通豈不有命耶旣而公雅升郎位再以郊祀恩封夫人樂安瑞昌二縣君至和二年公雅罷南劍州夫人從還京師道病發亟命旋歸以

三月二十日終於正寢年六十七月二十九日葬江陰軍江陰縣化龍鄉祔於先營有子蒙登進士第處州縉雲尉女一人未嫁孫六人曰逢郊杜齋郎曰克曰三老女幼夫人守禮法動止有度舉族姻內外無有不得其所持生簡約使公雅能專意公家而無錙毫擾於民有內輔焉喜誦浮圖書終將遺戒薄葬祭之具神情如平生無有悲怛蓋婦人之難能者銘曰

叢蘭之芳一香同色生于名家化洽禮則歸助其夫約清厥德唯善不忘壽兮有極新阡崇崇

子孫孝思寘文幽堂茲後之儀

延安郡主李氏墓誌銘

延安郡主李氏太宗皇帝之外孫真宗皇帝之甥
齊國獻穆大長公主之女也父爲鎮國軍節度使
駙馬都尉贈太師中書令尚書令許國公謚和文
諱遵最大父運州刺史贈太師諱繼昌曾大父樞
密使鎮國軍節度使贈太師中書令尚書令隴西
郡王謚元靖諱崇矩家世勲業列在國史大中祥
符三年十一月主生於永寧第彌月獻穆公主見
主於帝所帝曰女吾之所出也且有竒法異時非

才賢不以速匹因出練帛以爲慶逮周晬召至內
省臨視除髮以珍寶戲物百餘種賚之甫七歲即
賜冠帔入謝賜見皇太子將拜之帝曰齒同矣孰
爲長徐推主生月日後皇太子乃使拜蓋欲以長
幼序之每燕會中常呼置旁坐所以恩愛之良
厚非諸王公主女所可擬天聖五年封長壽縣主
以歸今閤門使忠州防禦使錢君晦錢氏自忠懿
王舉所承襲十有三州之籍上于朝廷而其人民
數十百萬不罹兵革之役以至太平陰施深長勲
美蓋世主家以是通婚姻及主歸而其君舅文僖

公以代誥命參禁密遂持將相印其族植笏而通省戶者以百數門闌廝役青紫群列號爲貴顯然以主之重務自損下主益恭謹持禮承舅姑奉祭祀夙暮不少懈姻親娣姒降屈色詞以相接親疎有意於是諸錢內外悉稱主賢明道二年進延安郡封自和文公薨主歎曰吾獨有母存乎孝憂愈至時物之新者必先獻乃敢用皇祐三年獻穆捐世主哀戚甚却珠金之飾日夜涕泣思慕因見癯悴上念先皇帝弟兄無復存者乃恤其孤謂主曰大長公主歲常資郡主厚甚今寂寞耶俸錢每月

六萬特增至十萬是年除夕主還外舍設奠蓋歲新矣而母不復見也號慟咽絕左右更勸莫能止夜中氣憊胸比歸疾益力戒二子自強以立門戶歛葬之用必以約四年正月四日終春秋四十有三上惻悼不視垂拱朝一日命中司賓臨弔賻贈加等以其年四月十日葬河南府洛陽縣却山之原從先姑之兆子三人曰景初光祿寺丞景裕大理評事其季蚤夭女適右班殿直趙思復封壽安縣君先主二年而亡孫男四人初女父和公博雅有文喜與賢士大夫游獻穆又以賢德輔之著

于天下主更見積習皆善行故不以貴勢富侈自用閭閻民有死喪不能給必資其家隸侍使令未嘗訶譴有嘉賓焉親視烹飪雖其資敏淑然有所從來矣主善書能爲五七言詩居間設烈女圖讀書史以自娛二子就學日程其所爲又勤解說曰吾觀持梁策肥者外雖矜豪而中空無有多慢侮人豈聖人所謂愛親者不敢惡於人之義乎若不爲此吾意安矣乃二子知所以爲學防禦君能亢其宗以有聲名主實訓有助焉銘曰

猗哉延安肖于慈親少所養習旣歸有聞婉婉

令善率禮而文唯時貴重世莫與隆群從祁祁車徒有容天子惟舅言朝于中北第高門爰東其軌父王之孫母兮帝子曰予爾思我適則喜旋于我家相應簪斧齊珥則多君姑娣姒以承以比和樂有序孝愛深矣哀隕其生子學而力夫以材名胡不遐考用觀厥成熟不願年曷支其傾惟德之壽寔久益明于何其壽其壽斯銘

尚書職方郎中謝公墓誌銘

君諱某字某泉州晉江人曾祖某祖某父某以

信義稱於鄉太夫人徐氏生三子君爲最少祥符八年舉進士歷撫州臨江府軍事推官太守受賂賄舞法君据平無所撓訟者不之守而之君州政得不敗守亦善去改大理寺丞知龍溪縣縣人曰是故州從事持守正使無害有恩於我相與喜具酒食相過從爲慶賀者至則決滯訟條刻舊蠹蟲民以便安徙容州北流縣城郭倉庾廨舍道梁一皆新之就知雷州軍州事州傳海有蠻夷風不知學爲葺孔子廟聚諸子弟教以儒術雷人業進士自君始大豪李郁築城得古印立盜契奪民

田百餘家五十年不能直有訴於君者即捕繫庭下問狀具伏而郁老當贖君條其甚惡不可假卒致以法通判福州畫購巨盜悉誅其黨諫議大夫方公謹言治廣州辟君貳政廉取蕃舶輸官之利以招其徠至罷去夷人涕泣思之知建州歲無留獄長老紀焉又知開封府之祥符治愈精微有聲名朝廷用薦者言將任以刑獄錢穀而君懇求便藩得海州會歲早有蝗過境一昔拱穢死吏民驚歎以爲異政之應皇祐五年正月十四日卒於官其孤護全柩以歸某年某月某日葬某縣某里

娶黃氏故直史館宗旦從妹也再娶其弟封永康
縣君子四人彥輔太廟齋郎先卒仲規舉進士第
越州蕭山尉叔矩未仕季成太廟齋郎女八人適
余昞祝嘏揚璟劉鼎臣黃世永朱仲陳大雅陳箴
君性樂易無貴賤親疎接之皆盡其衷故人多喜
愛之數官嶺表不以僻陋自失所至喜設施爲民
賴利在海州嘗謂其子曰謝氏居閩未有仕者吾
起家州縣自大理丞八遷爲尚書職方郎中贈吾
父都官郎中母長壽縣太君斯亦榮矣歷官三
十九年無小過失實吾謹畏然爾汝曹念之故其
子益循篤學皆可以大其家者銘曰

六十九爲已壽位郎官才未究政在民斯不朽
內殿承制王君墓誌銘

王君諱翊字輔之兩浙都巡檢使罷還皇祐五年
五月七日卒于京師以其年七月二十四日葬于
開封府開封縣褒親鄉其孤號哭而杖授書使者
以來 銘曰我先君之先錢塘人後遷于汴少孤
家窶以書藝補官歷七任終六十有一今葬有
期且走公門下日久固知其所爲幸或銘諸墓使
有聞於後世公之賜深矣余爲次其官族初授涇

州保定主簿治有稱再調永州司理參軍州將曲
獄君曰獄辟定法可妄移哉永邊溪洞蠻獠寇境
殺巡檢使君請募敢戰五百人自率之遮阨設伏
餌以羸形賊果來擊之敗走入焚其廬以理官不
應捕寇不當其賞除常州無錫尉轉運使段少
連以材明嚴察部吏每行君縣必載君舟中語至
移日出界乃遣尉滿君歎曰俸微不能芘吾族還
都退居視時物上下取與出納居二年廩有粟馬
所與遊皆貴近人久之陝西用兵討元昊君奮曰
陋矣吾視此屑屑耶上封章言十事書奏即召

對延和又令於資善堂究陳利病再遣使問所欲
為曰臣言可用幸天子用之不敢徼利夏隨為陝
西招討使薦君智能授左侍禁涇州長武寨主元
昊入寇至渭州寨民將逃去君諭之曰入保此吾
能必守衆乃止遷西頭供奉官河東麟府路走馬
承受公事 堡寨一十有五招懷蕃戶二萬餘

每進對多言時政得失輒觸權要再遷為承制三
司使葉公清臣任君監在京推貨務僅十月計所
贏錢二百萬三司使移他官君失所知求見上言
事願解局遂除都巡檢使又上書曰臣有通流貨

財之術歲可得錢千四百萬欲道其所以然於上前再三不得召猶曰罷歸幸得望殿陛咫尺盡吐吾術矣比至京師病且卒卒不能出其術悲夫君娶胡氏子七人男曰威三班奉職曰玠競舉進士競中第喆珏皆幼女長適前河中河東主簿呂公次適謝公弼蚤亡銘曰

材以時成則資材艱於用匪成之艱利國有原動如轉圜曰時與成惟命惟天

右班殿直監磁湖都鐵冶務程君墓誌銘

程君居興國軍大治縣世為著姓右班殿直諱叔良字仲卿尤有善行其曾祖諱侃仕偽唐軍器副使祖諱滿光政院承旨父諱昭字某三班奉職以材智自高金陵平浮江而上至磁湖依鐵山冶以通吳蜀之利積數十年致鉅資散施周人急難名譽翕然君承父兄之舊少從學好老氏書服其慈儉之訓所居夏秋潦水環民舍衣食無所從得君計其口而食之疾者餌以藥石死者葬以椁歲用為常明道中江南饑疫殍殣狼籍道上詔督郡縣開廩以濟之發徒以瘞之尚莫能周而君之里間

無饑人無露骸其視人之所苦若出於己晝夜不
懈親戚之貧而歸者隨所厚薄而活之至於資身
自爲約薄不營出入悉責家奴時一省視去其欺
已者以是雖居豐有而甚適旁居田墅治園池植
草木發泉石在處爲亭臺賓親遊行嘯歌一醉
洒然當世名公卿作詩以詠道其善年五十有六
以疾終皇祐二年閏十一月六日也將疾自疏簿目
一通皆治喪事親族之禮施用之具與其葬所若
年月日旣終其孤啟而行之無有乏事遂以五年
十月二十五日葬於流水里之南岡君兩娶鄭氏

有子九人男大年三班奉職治經史力世其家曰
龜年堯年康年皆敏飭向學女五人長適大理寺
丞郭之美次適開封府太康主簿蔡高次適衛尉
寺丞聶平仲二人尚幼太康主簿予亡弟也以婚
姻家知君最舊有所部官嘗以書通客與之錢不
能塞其欲其人後言財利事得出使南方猶泄前
怒增君官課鐵歲百萬指期必破產或諭君出其
手迹以直其事君曰寧破吾產勿破我行予乃知
君終長者爲之序且銘也銘曰

致適於無以放其身厥隱于真捐已之有利及

於人唯義之倫愛協鄉閭不獨其親允富其隣
生也勿累沒焉不泯考信于文

泉州司戶參軍葉君墓誌銘

葉君任字仲堪興化軍仙遊人父諱賓尚書都官
員外郎致仕恩補一子官君以是爲江州德化縣
尉歲餘乞便家事親得泉州司戶參軍時監司有
不喜君所爲不苟者因自牒去職歸侍都官府君
至歿不去左右遂無意仕進以終其身君於爲吏
臨衆必先繩其尤強猾者治民必先憐其尤貧弱
者故所至必辨而去則思之上官以勢奪其是如

以礫食吾不從也其餘家居廩有餘粟遇歲凶荒
薄其直而出州黨賴之民有喪與疾時其急難以
濟其力游舊之好益愈親若寒而就燠吾不去
也故其生也人譽之而亡也哀之迹其所從來蓋
有以得之者初棄官歸年方壯強頗窮山水娛詩
酒以自放或說君起仕君謂之曰達者人之表而
議之招也享其利而不勝其任得所欲而違於義
君子不爲也古之人所以約而自全者其心豈異
乎人哉蓋知其所以然而安於分也且怵惕窮年
孰與茫洋無間以自適乎君生五十四年而終於

嘉祐三年十一月三十日葬於歸德鄉化善里其
世次予嘗誌都官之墓可從而考也初娶王氏再
娶呂氏皆有賢行而蚤世長子曰祐以文詞爲名
進士卒年三十曰裕十有五歲持父喪如成人曰
裕尚幼女十一人二人適太常博士許禎郴州宜
章令陳啟期六人爲進士妻三人未笄許君與予
善述其孤之意從予請銘銘曰

行修於鄉而老少之懷志安於分而榮悴不遷
此力於吾道者也若夫冥乎造有之端託於適
化之會於我不居乘時以行抑老嚴之徒歟

太常丞管勾河東機宜文字蒲君墓誌
銘

蒲君叔範天聖八年自閬州以進士貢至京師年
二十第中乙科余時少君一歲而第同籍居同巷
出處相從意氣相得也皇祐五年君以太常丞管
勾河東安撫使司文書隨其府君并州而余爲知
制誥權禮部貢舉有以雄詞壯論異於衆者驗其
名氏曰蒲宗孟其父師道乃君諱也是年春宗孟
釋褐予喜君之有子且將賀宗孟歸亟以書計曰
我先子以四月一日終於官孤宗孟扶喪以寓京兆

明年十一月一日遂葬京兆府咸陽縣龍首鄉之北原敢以告余既弔之而爲之誌其葬曰君曾祖茂璘仕僞蜀爲彭州判官祖頴士善藏書父伸贈大理評事三以鄉薦退於春官自號北谷散夫君承父詞又得所蓄書以讀而性警悟十餘歲能誦經傳屬詩賦陳漸以文學名於蜀一見君所爲詞章乃以女妻之今延福縣君也太夫人陳氏追封奉先縣太君少失所恃事繼母朱氏封壽昌縣太君禮孝尤至故鄉黨稱其詞行及蒞官處事又以材聞初授成州團練推官吏易君年少不更事

君未旬月已通法令簿書擿其隱謾惕惕畏服再調延州推官元昊慢形見君謂州將郭勸曰度元昊必變變則延爲寇衝城圯塹堙無以爲備願建言治之郭勸以其言聞于朝報不下旣而元昊果叛詔城延州君曰役促民勞未戰而困也范雍以振武節度爲陝西經略使治延州宦者盧守勲爲兵馬鈐轄中貴人臨邊自喜事必已出嘗欲決有所行而雍難之守勲怒發聲色引起君止之復坐曰太尉爲大帥而軍政不一鈐轄驕傲如此何以帥下願太尉斬之以徇衆守勲泣恨日擗其過至

罷歸莫能賽所願尋爲武寧軍節度推官梁洋二州人爭水利數十年競訟至破產不已朝廷下其訟轉運使遣君按視君從二州人以行隨所曲直而辨之爲立約束分流溉注二州之人各當所欲迄今便之以父憂去職服除除鄆州觀察判官監杭州清酒務改太子中允知京兆之高陵高陵前號難治君後威刑而先禮教有父兄告其子弟之不令者君召其子弟語之曰順於父爲孝順於兄爲悌汝以悍父兄之心遷而爲順則爲善人夫何難哉我即坐汝不人類矣聞者愛服遷善縣豪距

縣二十里作府君神祠以巫覡蓄蛇怪日言禍福簫鼓歌舞通晝夜男女往來輸金繒木石爲之立廟至有冒爲尚方器服者君與民期曰今將禮府君神民聞令來悉集旣至羣豪翼巫覡以導君曰未齋潔未宜見神且汝能迎置府君神者及能帥衆力而廟者巫能通神以下福禍者果誰乎衆各指之君即麾縛數十人繩以嚴法籍其財而夷其廟移知泉之晉江會宣徽使李昭亮知延州奏君改發署判官事宣徽徙澶州并州皆辟爲從事君感宣徽之知己事無鉅細力爲畫議君沉靜有

識慮壓於貴勢必諍辨是非平居鮮語人過喜察
姦貪梏其手則已不務煩苛善議論上書言禦戎
備蜀廣儲嗣事皆切於世者而官止太常丞年止四
十有六自初仕至終皆在幕府助人爲政而未嘗
得專所爲以見於人也既卒貧空孤宗孟紹其家
有女七人三嫁爲士人妻四人尚幼其稱明年至
和元年也銘曰

才不必有位而德不必有年或曰命然生有善
行而歿有嗣傳孰與祉焉已乎奈何歸安茲阡

莆陽居士蔡公文集卷第三十五

莆陽居士蔡公文集卷第三十六

墓誌銘

尚書職方員外郎呂公墓誌銘

贈光祿少卿沈君墓誌銘

尹夫人墓誌銘

光祿卿致仕張公墓誌銘

工部尚書集賢院學士贈刑部尚書謚曰

襄余公墓誌銘

司農少卿致仕王君墓誌銘

尚書屯田員外郎郭公墓誌銘

端明集三十六

尚書禮部侍郎鄭君墓誌銘

尚書職方員外郎呂公墓誌銘

呂公諱士昌字子弼天聖八年舉進士及第調吉

州永新尉婺州司法參軍用舉者改大理寺丞監

常之商稅務移知益州靈泉縣以太夫人高年願

監舒州皖口倉君未行服喪外除知江之德安罷歸

三司使田公况辟君編三司例策書成二百卷權

知功州五遷爲尚書職方員外郎知潤州以代期

未至寓居江陰軍嘉祐五年七月十九日終年六

十二七年正月十三日遂葬江陰之江陰縣化龍

鄉曾祖諱裕東平壽張人祖諱某贈大理評事父
諱延之終湖州節度判官因家真州之揚子縣贈
屯田郎中母趙氏贈永寧縣太君繼母孫氏仙遊
縣太君娶葛氏封壽昌縣君男三人曰袞許州臨
潁尉袞袞皆進士女二人長適楊濰次未笄范文
正公薦君館閣之職田公又薦爲提點刑獄皆未
及用而卒子弼寬恕渾厚與之言初若可見其際
及游泳益久即不知其所之視世俗窮通壽夭榮
悴憂喜無一事可係其志居間讀書爲文優游終
歲其與人處若槩取之從容而論當世士蓋所與
者無幾矣嘗得僞造印文者其法應免遠官及移
蜀或謂用此可免君曰幸人之死以追移蜀吾不
忍爲其所以爲人大率如此此前世所書有德義
量度君子不能過也銘曰

內全於德不與世異官無顯功進不近利古有
君子其道斯類嶷然高風薄夫之媿

贈光祿少卿沈君墓誌銘

府君諱平字遵道曾祖曰籍衢州常山令祖曰德
饒越州剡縣丞父曰仁諒海州朐山令其先吳人
剡縣丞卒葬會稽後朐山退老於和州因而家焉

君少與伯兄曰及舉進士爲文章通書史旣而伯兄景德及第以仕而昫山致政事還歸君曰吾其養親乎歷陽闢田疇因物適變遂以富饒計鄉黨親戚厚而周施之逮親終伯兄服喪乃籍所有以奉之伯兄曰吾利汝財乎於是悉力以治喪事久之族子欲異產與之利田宅而自取其中下者衆益義之君曰吾有五子教以儒術清白足矣其不富之患乎以天聖二年四月二十二日終是月二十八日葬於龍場岡之原夫人胡氏男五人曰立齊京言克女三人君蚤歿夫人賢而有禮訓育諸

孤立以進士中科爲尚書兵部郎中兩浙轉運使迎養三十餘年累贈君光祿少卿叙封夫人壽昌縣太君嘉祐六年夫人卒明年舉祔舊塋兵部博學有文藏書二萬卷又所至稱職將以材能進於時宦仕顯榮其可量哉所以知君識慮之遠也銘曰

不仕而耕以養其親而終於其身于嗟孝兮力而豐有施及州里推其族子如其義兮守法儒學教厲子孫實大其門不亦智兮龍場之下卜吉而藏勒文前岡孰與壽兮

尹夫人墓誌銘

夫人姓尹氏父尚書職方郎中直昭文館諱少連郎中有數子而女獨夫人又少聰警識圖書辨音律故加愛焉及長以歸國子監丞葛君實丞晚得官當未仕與夫人治家事夫人事姑勤謹不懈而於夫人之族親撫接皆有禮意母楊氏諸子隨官遠方夫人念母之老迎歸以養年八十餘終於夫入之家即葬近墅其於孝愛深矣丞以文進而久不第夫人未嘗戚戚歲時奉祀與娣姒族親宴飲列女僮鳴管絃以相和樂觀世之休悴初不經

慮益喜浮屠書頗知其指歸有男令彥汝奇皆舉進士女適真定亢氏主簿施硯其季幼也內外孫八人享年六十以嘉祐六年八月初九日卒八年八月十五日甲申葬江陰軍江陰縣化龍鄉丞曰吾妻之賢君不可以不誌間千里之遠以來請銘其銘曰

詩稱公侯首考其家均一之德法度是循唯彼婦道於斯則難嗚呼夫人茲其尚焉

光祿卿致仕張公墓誌銘

公諱盪之字景山其先黃帝之孫始作弓矢主祀

弧星以官受氏周衰六國爭雄而張氏五世相韓
良佐漢有功侯於留留侯之後丞相禹司徒歆子
孫益多散居四方其居東南南繼爲大姓曰簡者
廣陵人生昇仕唐爲滁州清流令昇生約金吾衛
長史約生訓公之曾祖也以勇謀事楊行密爲黃
州刺史祖諱璆仕僞唐校書郎後典親兵贈尚書
屯田郎中祖妣顏氏考諱似右內史學士太祖平
金陵從後主歸京師授贊善大夫在太宗朝建言
時務評讞法令多所施用終給事中累贈太尉妣
馬氏贈清河郡太君公少孤知力學問有名於時

大中祥符八年擢進士第授温州樂清尉再調潤
州觀察推官召還校館閣書遷殿中丞集賢校理
通判常州常饑發運使急於官糴穀益貴公奏罷
糴而民不流亡蔡文忠公薦其材可任監司之職
時輔臣不公悅者出知温州文忠公又薦之徙淮
南提點刑獄楊崇勳以恩倖橫恣護吏漁民縣令
有不已從者崇勳怒下令獄公往察問而出之流
所護吏數十人崇勳怙怙顧首尾於是部郡相視
以法移廣南東路轉運使廣之夷落有罪任其酋
以夷刑夷刑慘酷公請以律令論海外船舶歲至

犀珠璣瑁諸香竒物官取十一城中濠與海通惡少年暮夜乘潮汐苞藏竒貨重物不肯輸官前有欲為水柵以制之者卒中毒死事遂寢公治材他所一日移置濠上水柵立成貨利稍稍入官海有羣盜聲指廣城民相傳動驚走郡為備具公料賊來不先聲徹備張飲人得以安賊亦果不來代歸權三司度支判官未幾除戶部踰月出為京西轉運使且行加直史館改授河北賜三品服是時契丹頻年遣使道路交衽供具百名取辦於民邊郡益戍兵調用滋廣公計其所必用取之擇其所不

急去之不以名使人要必功實雖米鹽下吏莫不延問稱薦禁束侵牟故吏畏而為用民以是便之轉工部郎中召還為三司鹽鐵副使其職文書繁夥公一省不忘條理出入下不敢欺三司使奏他事上見公姓名獨語曰必須再去又首肯之明日除天章閣侍制河北都轉運使人辭上曰卿之行出朕意既至璽書委以密察邊事軍馬重輕與兵官材否公感激天子所以推信勵力以安百姓實邊塞選兵擇吏為國久計未幾保州兵叛州兵幾萬人號都巡檢司先嘗從太宗北伐有功敕其軍每

出巡別給金粟兵分三部州將領其一裨將領其二其後州將典城兵不出巡亦不復給裨將皆中貴人月必出巡出則給之或言其不均者朝廷委公其事即允以武臣代中貴人總三部之兵更其出入而廩給均焉中貴人罷去悒悒懷恨未有以危公者會監郡與主兵官不相能辱之兵怒殺監郡閉城判而以公罷其金粟之給為名公馳至城下廼即以兵環之朝廷累下敕榜招降而門其東西至堅且懷疑太子少傅田公况時總其事遣部將郭逵入城曉諭門開諸將入其唱為亂者千餘

人衆恐其為變公謂田公曰保界虜壤兵驕叛亂如此反覆未可知今不芟除所謂養虎自遺患也於是悉坑之保州平奪職知虢州居三年貝州軍亂先其所欲危公者謂公前使河北有祆人李教坐法公寬之貝卒得李教為師以亂冀人段得正將詣登聞自陳常為李教獄詞逮連教父曇轉以私書屬公同職者得詞絕至澶州監河橋索其藁以聞事下御史府貝之亂實無李教而得正所訟無根猶追三官監鄂州商稅復工部知漢陽軍祀明堂恩遷刑部復待制知湖州又移揚州公自以

直廉遇天子任使欲以所有唯上所用不幸一跌
摧落不復自振年且至矣遂上書乞還官職之事
徙潤州申請益堅除光祿卿致仕還老常州以嘉
祐七年十一月二十九日終年七十八遺命葬滁
州清流縣昌城鄉杜沛村從先人之域諸孤以治
平元年五月二十六日克葬先夫人任氏後夫人
魯氏參知政事肅簡公宗道之女封 壽郡君男
曰次卿試將作監主簿蚤亡曰次山次元並大理
評事有材能名女六人長適京西提點刑獄宋任
次適廣東路轉運使秘閣校理蔡杭次秘書郎田

沈次著作郎佐蔡天球次新鄉令石約次大理評
事呂希哲公忠廉鯁直以節義自尚愛友親族甚
厚謀於國不以其身之安危篤於親不以其人之
厚薄吏治精明施設若煩密難通而公持之簡易
所至民懷其惠而不觸其令尤於本朝故事詳悉
自建隆以來史所不紀每指一事即疏其人姓名
年月最為審據家居或客使造門語及天下利病
慷慨議論憂發顏面忘其身之老也夫士之處世
立一節一行已能自見於後况其多者然必有誌
錄乃可傳信銘曰

礪世之速先於飭身防吏之嚴本乎愛民資國以富其要曰仁佑武以制其威曰神力志於斯庶用自伸矯矯在公卒更於人顧言返葬社沛之原寘文坎中名與石存

工部尚書集賢院學士贈刑部尚書謚曰襄余公墓誌銘

治平元年六月癸亥工部尚書集賢院學士前知廣州軍州事余公薨于江寧府之行舍以聞天子爲之不視垂拱朝一日賙賻有加贈刑部尚書謚曰襄其孤奉公明年七月二十七日葬以計來且

求誌其壙某爲次哭之已謹序之曰余氏自閩徙於韶之曲江曾大父從大父營父慶累贈太常少卿母黃氏追封吳郡太夫人公諱靖字安道天聖二年中進士第尉虔州之贛縣又中書判拔萃科改將作監丞知洪州新建縣再遷秘書丞入崇文館校三史謬誤景祐三年充集賢校理范文正公知開封府屢言丞相過失貶饒州言事者畏縮不敢論列公即上疏曰古之帝王逐諫臣終爲盛德之累仲淹宜在朝不宜遠謫坐是落職監筠州稅尹公師魯歐陽公永叔繼之皆以朋黨斥去某官

微不得自達作詩四篇以直之一日傳于京師故天下目爲四賢移監秦州稅又徙知英州丁太夫人憂還朝復集賢校理同判太常禮院慶曆三年上念西夏亂邊官軍屢敗四方困於供億議增置諫官四員以補聰明向之觸丞相而得罪者頗引用除公右正言於是朝廷之大議政事之得失權臣材德之是否士大夫之賢不肖莫不盡心而舉正也元昊爲患日久時議有金繒之賜輒首罪稱藩將從其請而契丹聚兵燕朔曰我爲南朝皇帝討夏人勿宥其罪朝廷謂借契丹之兵以討賊

則彼自矜功拒元昊之請絕其向順之路必也却契丹而納元昊當得使者以成其事公亦屢言二鄙利害乃遣公使契丹旣至辨其曲直以理奪之比還契丹收兵元昊稱臣四年知制誥史館修撰其年再使坐習虜語出知吉州數十年間天下風俗以謹默自守掩覆瑕垢爲長者一日刺舉彈繩多或罷免又嘗所言者進持國柄仇人乘勢中以事授將作少監分司南京久之改光祿少卿天子且欲復用權臣以諸衛將軍壽州鈐轄處州服父喪儂知高陷邕州循流東下破九郡次廣州以

秘書監起公喪廬知潭州金革之事義不得辭改知桂州經制廣南東西路賊盜事廣城堅不下賊大掠西歸所向無前趨邕州欲倚峒穴爲久居計公先移檄交趾及諸峒使之捍賊智高至外無助援會朝廷命狄宣徽青將兵至公與孫公元規實共其事智高敗走復邕州乞解官追終喪制誥不允除給事中仍治舊府御史梁倩言賞不當功又遷工部侍郎選死士人特磨道士擒智高母與弟送闕下戮之克集賢院學士尋遷戶部自言久官嶺外瘴毒所侵惟陛下哀憐又移潭州青州遷吏

部嘉祐五年交趾入邕界殺巡檢五人駟召公於青州上諭之曰卿熟南方事已授卿廣西體量安撫使其勿辭公至邕召交趾用事者費嘉祐詰之曰汝主世爲藩臣何敢爾耶邊民私忿相酬不知官軍誤犯之幸得自新當送首惡者歸命旣而械致五人泣刑于欽州歸奏所以治蠻之狀授尚書左丞知廣州今天子即位遷工部尚書廣多竒貨南官者蓄以爲利公戒其北歸勿得持南物其俗輕揚教之禮法簡而不苛去之日百姓懷之公薨年六十五娶林氏贈尚書工部侍郎從周之女封

魯郡夫人男三人伯壯殿中丞蚤亡仲荀太常博
士叔英大常寺太祝女六人長適尚書屯田員外
郎郭師愈次秘書丞孫邵次建州司法參軍周熊
次秘書省校書郎章惇裕二尚幼男孫四人嗣恭
嗣昌皆太常寺奉禮郎嗣隆嗣徽未仕女孫五人
文集二十卷奏議五卷三史刊誤四十卷公之在館
閣居諫院某嘗同職事其斥筠州使北虜經制二
廣賊盜平定交趾知廣州皆見其行也故其學術
文章忠義謀畫知之最深居常謙畏寡言不敢少
忤于人及論事上前分解落落詆刺大臣易于褐

夫出入兵戎危難之地若在宴處何其壯哉已之
無悶用之有爲斯其蹈夫道者也銘曰

公進于朝卓爾辭藝任之諫諍直言警世西夏
亂常寇攘洊歲翻然向內願輸信誓契丹橫議
集兵幽薊單車出使安危是繫胡騎引歸羗酋
受制風雲指麾天日清霽峒獠猖狂自西而東
起于喪廬經制元兇賊竄窮荒生致其母戮之
馬市腰領殊處交趾來擾再徃南土呼其種豪
屈之一語二廣十年恩威是宣公薨民啼其何
使然返葬

終斯全我銘公墓唯信之傳

司農少卿致仕王君墓誌銘

達夫諱益恭姓王氏其先居太原徙潞州曾祖諱
崇贈太師曾祖妣周氏齊國太夫人祖諱景純贈
太師中書令祖妣祁氏魯國太夫人父諱

同今上
御名

樞密使吏部侍郎同中書門下平章事贈太師中
書令兼尚書令魏國公妣石氏追封永嘉郡太君
寇氏華原郡太君自魏公始家河南今爲河南人
君子大中祥符間以蔭補右侍禁天禧三年奏換
衛尉寺丞自衛尉六遷爲尚書司封員外郎康定
二年以司門致仕皇祐三年大饗明堂除庫部以

大祀恩用子升朝例叙封改水部又改倉部考功
二郎中嘉祐八年上即位授司農少卿治平二年
三月十二日終于西省思順里第年七十四以其
年十一月二十八日葬河南縣魏封原先公之域
娶李氏封金城縣君子二人謹言尚書駕部郎中
謹行殿中丞女三人君所歷官監昭應宮法從庫
開封府襄邑縣稅西京麴院磨勘司簽書河南河
陽府節度判官公事最後知河南縣凡九任行三
十年清修無過必稱其職嘗慕唐王龜之爲人務
遠權利魏公之治雍孟襄汝也皆去官侍養逮參

知政事于洛陽治新第成君致書于魏公陳老聃
止足之戒願引年謝政還居于家輔藥石導和氣
以延壽命言詞懇懇公以詩荅之曰疏家子歎揮
金後禦寇妻悲遺粟回爭似吾兒知止足陶廬容
膝早歸來公以朝廷恩數倚任之大至于將相終
薨服除君授河南自伸夙志遂還官事
日與高隱者遊晚年喜釋氏篤好華嚴經日繙一
帙深通體用止觀之趣家所藏書雖子弟求閱必
手自檢授出入甚謹而于田產資利隨所厚薄視
親疎急難賑濟之不復會校洛下多名園時與其

弟觴詠終日陶然自娛居閑古書真畫間或展閱
其外紛綸過前不吾接也嗚呼當少時父爲大官
乘勢可進輒以書規切冀其引罷仕及中年後有
顯位可指而待輒棄爵祿人情莫不好榮觀而厭
卑處君豈異于人哉顧其中所存者勝所爲故能
安于所尚非天機淡泊動與道合者惡能至是邪
某與君昆仲游最久于葬之先君之弟兩浙轉運
使尚書刑部郎中集賢校理益柔狀君之行以銘
見託銘曰

大道之行人隱于天其德純明不居物先薄夫

懷貪生死利勢扳躋勇前罔或畏耻嗟嗟夫君
中年退休超離造化蕭散林立高尚之節可監
于後聲名日遠于君何有

尚書屯田員外郎郭公墓誌銘

郭君諱之美字君錫世居廬陵自其考始以文詞
舉進士君錫少聰敏加人從其父學景祐元年年
十八與其父同日登第仁宗皇帝臨軒賞其爽異
爲改今名初調蘄州蘄春再授楚州淮陰皆爲主
簿以吏事不中法去官慶曆三年爲梧州司戶參
軍年復注惠州轉運使聞其名用之權

韶州

州有鑄錢監監卒怨其監官是時

儂智高叛輒請于監軍韋貴曰願往邕州擒峒賊
貴叱去之君策其必變曰叱之所以激之也陰爲
州備其夕監卒殺監官趨州門斬關且進門有備
兵出其不意格鬪誅斬略盡儂智高入廣州肆兵
外掠又移權知南海番禺二縣募敢勇亡命之徒
遇賊必戰殺獲甚多所至賊爲之縮斂蔣偕被命
專討軍無法律遣使召君計事辭不往後數日偕
爲賊擒皇祐五年以功除大理寺丞僉書南雄州
判官公事以父喪不行又丁母憂服除以大理丞

知兗州萊蕪監嘉祐五年遷丞殿中監在京豐濟
倉賜緋魚天子即位恩遷太常博士初作永昭陵
河南府素號窮空所費仰給三司時余爲三司使
薦君於永安入中錢糧善計纖悉終以辨事時議
稱之改尚書屯田員外郎治平元年知開封府中
牟縣縣居京西一舍仍歲水災多盜賊賦斂頻數
民益貧君視其部中溝洫不治因上書乞治水嚴
盜禁均賦役期月之間使客稱其畢給百姓頌其
均平而不擾未幾以命免仍坐舉故人之爲長吏
者入官長吏有罪追君一官罷去百姓條君善狀

訴於京尹願留不得即遮丞相馬首叩頭噓唏幸
少賜我旣又不得泣涕而去明年歸蘄州未至終
於舒州桐城之傳舍其孥以喪歸十二月二十一
日葬於蘄水龍潭山先人之塋享年三十曾祖諱
諫祖玠考諱佺

事推官累贈太常博士

妣施氏封安福郡君

娶程氏再娶王氏男

曰大時大明爲進士大昕大與三女皆幼好學
多通理勢重輕之術每官必有記述皆世之要用
有文數十百篇尤善論兵數上書言慷慨病且革
歎曰丈夫固當以病死耶君之弟之翰以書自蘄

至杭告余曰兄辱知於公今失官而死且葬矣公其哀憫其孤而銘其壙以慰存沒余爲之銘曰事而不試惠而不施古人有言世莫我知進焉而躋壽止於斯匪世之疾又將咎誰

尚書禮部侍郎鄭君墓誌銘

鄭君諱紆字武仲先世居秦曾祖諱保雍始居安陸客有寓錢數百萬而死他日得其子還之客子莫知所由辭不受遂施之浮屠氏於是湖湘之人稱其長者祖諱嶼東頭供奉官嘗總兵秦隴聞以數十騎人乘虜鄣虜畏其名考建中舉進士積學

而多材能悉產以濟人急難故與游者多名人君承數世累義之美資性明敏所習過人初應明經以爲不足以自立曰吾豈誦數者又舉進士天聖八年登第注安州之應城簿越州司法參軍改大理寺丞遷殿中丞歷知婺之蘭溪越之餘姚徙知益之新都貧不能行監楚之北神稅湖南安撫使王絲薦君爲簽書桂陽監判官廳公事權潭之長沙其縣喜訟難治君視其繁爲簡其術如無一事劉丞相號爲明果時知所爲大喜稱歎轉運使時其事叢臨縣觀狀非其要不

問問即自陳雖得罪者亦喜躍而去柳州宜章民持偽券奪人之田屢獄不直委君決之君覽案曰義章以太宗舊名而更之市田之歲在義章其券乃今宜章印也獄遂決三遷爲尚書都官員外郎審刑院詳議官峒蠻儂智高寇邕州詔龍圖閣直學士孫公沔往經制之辟君與行從招討使狄青破智高於邕州界是夜軍輒驚擾孫公謂君曰行者數人多以事避去今獨君在此真義士也以勞受職方權大理少卿君通春秋及爲法官多引律傳經酌理參讞有可矜者必爲之言殿直曹且監

主自盜應死君曰其父僕嘗戰歿仁宗聞之惻然爲減一等仁宗恕寬哀矜令天下大辟有疑或情可憫者得以上聞四方體朝廷好生之意率以情法遷就求爲末減君曰法正情直州郡當自決之今乃諉上以苟僥倖類是者請置之法於是朝廷著令以班天下遷祠部郎中嘉祐元年五月甲子卒于官壽五十有六累贈尚書禮部侍郎喜讀書記其大旨以資職業比爲審刑大理以中道論法不爲守文吏故所濟活甚衆爲詩有精思入唐人風格清峭可尚尤善章奏書牘諸公或請之皆了

其意而文彩蔚然祖妣傅氏妣楊氏天水縣太君
劉氏河間縣太君娶李氏汝南縣太君駕部郎中
文蔚之女今夫人鮑氏樂安郡太君其父 職方
郎中男五人獮著作佐郎知潭州攸 諫
知制誥知荆南府猗將作監主簿猛 士

張蒙山以治平三年月日葬于安州安陵縣某鄉
余與君爲同年進士少嘗仕官往來數相遇於淮
浙間每見飲酒笑謔不休皇祐中司諫以文中科
爲天下第一余嘗慶君曰子爲狀元而其父固可
知已用是爲適今援毫襞紙遂銘君壙遽至於此

乎銘曰

材力之決要必有成文詞之敏煒燁敷榮傳經
裁讞區處和平世資以義用永厥聲屯于其躬
來者其亨坎中之紀後世之評

莆陽居士蔡公文集卷第三十六



右宋槧本蔡忠惠集三十六卷晁公武讀書志云襄字君謨興化人天聖中舉進士慶歷三年知諫院仁宗慨然思治增置諫官四員君謨在選中皇祐中知制誥累遷翰林學士權三司嘗知福泉杭三州是本首題蒲陽居士蔡公文集版心書端明集蓋忠惠曾為端明殿學士猶稱龍圖者其實非官名也前有王文忠公序云初見其四賢一不肖詩於張唐英所撰仁英政要甚歎慕之其後見公文集乃沒而不載竊以為恨乾道四年冬得郡溫陵道出莆田求其遺文則郡與學皆無之於是移書興化守鍾君松傳君自得訪於故家而得其善本教授蔣雍與公同邑手校正之鈔版於郡庠得古律詩三百七十首奏議六十四首雜文五百八十四首而以四賢一不肖詩置諸卷首與奏議之切直舊所不載者悉編之比他集為最全據此則文忠校刊之本勝於從前諸本多多矣四庫總目云宋史藝文志載襄集六十卷奏議十卷文獻通考則作十七卷多寡懸殊疑通考以奏議十卷合集六十卷總為七十卷而傳論倒其文為十七卷耳今按郡齋讀書志亦通作十七卷與通考同而直齋書錄解題作三十六卷與此合蓋當時或有多寡不同故文忠謂此集比他集為最全然則世所傳本恐無復多於是者矣總目又云書錄解題惟載十册三十六卷之本元代版復散佚明人皆未覩全帙閩謝肇淛嘗從葉向高入秘閣檢尋亦僅有目無書據此則文忠所刊者僅見陳振孫之著錄而已在前明內府中並未得見是本也總目又云萬歷中莆田盧廷選始得鈔本於豫章俞氏於是御史陳一元刻於南昌析為四十卷興化知府蔡善繼復刻於郡署仍為三十六卷而附以徐勣所輯別紀十卷然盧本錯雜少緒陳蔡二本均未及詮次後其里人宋珏重為編定僅刻其詩集以行雍正甲寅襄裔孫廷魁又裒次重刻據此則現行之本只據盧廷選所得鈔本展轉沿刻終未得見文忠所刊之原本也總目又稱四賢一不肖詩集中不載今本不以弁首知非十册之舊按文忠序云國朝四葉文章尤盛歐陽文忠公徂徠先生石守道河南尹師魯莆田蔡公君謨皆所謂傑然者永叔之文追配韓子其剛氣所激尤見於責高司諫書徂徠之氣則見於慶歷聖德頌師魯則見於願與范文正公同貶之書君謨則見於四賢一不肖詩文忠之立言如此蓋古人編刻前

賢文集必自有意旨所在如劉禹錫次呂衡州集斷自人文化成論至諸葛武侯廟記為
 上篇李漢編輯昌黎集則以感二鳥諸賦居首非若後世僅事剽剽之功已也是本鏤鏤工
 緻其字畫皆歐體間有闕供迺名手摹仿補足紙色墨色渾然如一迫視之幾難辨別可稱
 天衣無縫流傳至今且六百祀而古色古香神彩煥耀想見忠惠在宋仁宗朝危言讜論
 持正不撓之槩生氣猶凜凜也而文忠立朝剛正史稱一代偉人宜其氣類相投校勘斯集
 精覈無遺當與梅溪文集後先媲美矣憶乾隆庚子之夏正陽門外不戒於火適適里居是書
 與家藏百衲本史記倉猝中同為法篋持去余百計鈎稽始獲青瑣還舊神物護持定非偶
 然茲藏於家又四十二載感手澤之猶存念雲烟之如幻正未卜後來復為何人所得循環
 展讀泣然而下 道光三年癸未仲春廿日少河山人識





圖書在版編目(CIP)數據

莆陽居士蔡公文集〔宋〕蔡襄撰.—北京:北京圖書館出版社,2004.6

(中華再造善本)

ISBN 7-5013-2484-0

I. 莆… II. 蔡… III. 蔡襄(1012~1067)—文集
IV.Z424.41

中國版本圖書館CIP數據核字(2004)第040237號

ISBN 7-5013-2484-0



9 787501 324842 >

書名 莆陽居士蔡公文集(全十六冊)
著者 〔宋〕蔡襄 撰

出版 北京圖書館出版社(100034 北京市西城區文津街七號)
發行 Tel:(010)66151313 Fax:(010)66174391

E-mail: Btstxb@publicf.nlc.gov.cn

Website: www.nlcpress.com

造紙 華寶齋
印刷 杭州富陽古籍印刷廠

開本 八

印張 一五六·七五

版次 二〇〇四年六月第一版第一次印刷

印數 一—二〇〇〇

書號 ISBN 7-5013-2484-0 / K·833
定價 五〇二〇圓

頁數 五〇二〇頁

裝法 ISBN 7-5013-2484-0 / K·833

印數 一—二〇〇〇

版次 二〇〇四年六月第一版第一次印刷

印張 一五六·七五

開本 八

造紙 華寶齋
印刷 杭州富陽古籍印刷廠

Website: www.nlcpress.com

E-mail: Btstxb@publicf.nlc.gov.cn

出版 Tel:(010)66121313 Fax:(010)66114391

發行 北京圖書館出版社(100034 北京市西城區文津街七號)

地址 北京 德勝門外大街(十七號)

